

四庫全書

集部

欽定四庫全書

集部

敬軒文集卷九

詳校官編修臣瞿柁

中書臣劉源溥覆勘

總校官庶吉士臣何思鈞

校對官中書臣李斯咏

謄錄監生臣王鉞

欽定四庫全書

敬軒文集卷九

明薛瑄撰

律詩

夏日簡焦羅陳張四侍御

長夏飛霜几硯清
公餘景物稱詩情
絲絲綠柳迎風細
灼灼紅葵向日傾
憲度已應昭典則
官僚況復盛才英
運開五百時難遇
願竭忠忱答聖明

挽李處士

鶴去蕪城不可招，海天涼月夜蕭蕭。
誰從載酒尋山寺，無復携筇過野橋。
黃髮交游紛雨泣，白楊阡壠颯風颭。
賢郎驄馬推恩日，定有鸞封下九霄。

送林鄭州厚

報政三年足好音，南歸五馬正駸駸。
一麾共仰重臨德，累試爭誇百鍊金。
芍藥有風成雅俗，甘棠無土翳清陰。
郡齋畫永多佳思，頻寄新詩慰別心。

樓上

都門樓閣倚中天
暇日登臨思渺然
樹繞西山濃著雨
地連東海淡浮烟
塵消綺陌填車馬
香煖歌臺醉管絃
獨有道人清似鶴
謾從華表記歸年

送王士悅浙江憲副

推轂年多老豸冠
分符吳越見才難
橫金已覺新恩重
衣繡仍為故里還
破浪樓船秋水闊
飛霜憲節海風寒
懸知到處山川好
行部應須次第看

歸到有感

連岡北下是吾廬幾載歸來覓舊居
手種孫桐高院落家傳喬木上霄衢
喪亡已是傷朋輩凋瘵那堪甚里閭
獨立秋風看秋色欲將心事問詩書

河汾逢王存紀叅政二首

京師一別幾經秋汾水相逢話舊遊
栢府久傳名譽美薇垣今見事功優
典衣祇擬通宵飲投轄都無半日留
又復匆匆成兩地朔風何處送鳴騶

索居殊覺故交稀忽見同官老繡衣霖雨方看薇省作
清霜猶憶栢臺飛論詩款款傾壺蟻話舊頻頻剪燭輝
壯志未酬知己共相期白首莫相違

酬辛儼先生見寄

先生歸老大河濱三十年來信始聞鄉比鄭公瞻舊德
經傳邵學挹清芬碧鷄傾蓋時雖久錦鯉通書意更真
見說門牆桃李盛不知誰占舜城春

示勝子

勝子行將至立年光陰莫使暫虛延收心切要存天理
閉戶常須閱簡編玉不磨礪難作器人非問學豈成賢
汝親願汝為君子朝夕應須念此言

示京子

京子年今十七時青春正好力書詩兒童氣象都無異
問學薰陶始見竒道大必先行孝弟業荒須切戒遊嬉
老來善惡由今日汝父之言汝細思

示昌子

昌子今雖十歲餘聖功元自養蒙初莫求俗輩梨兼栗
須讀前人詩與書抄手出門毋浪戲正襟掩戶要端居
汝親願汝身長日頭角崢嶸與衆殊

過郭林宗墓

幾經滄海變桑田孤塚常留古道邊彩鳳自應鳴曉日
冥鴻終擬沒秋烟關河迢遞膺舟隔江漢空茫稗信傳
千載有碑應不愧路人猶自識高賢

題張侍御質魯齋

混沌那堪七鑿餘紛紛巧智定何如壁完太璞應無價
學到希夷始似愚往哲每能存本領斯人有意篤詩書
試論質魯齋中事一唯方能味道腴

題何郎中卷

粉署郎官詔許歸都門祖席倍增輝九天光逐迴鸞動
三峽雲隨畫鷁飛慈竹滿庭浮曉色芳花繞戶送春暉
一門喜氣深如海萬里江流接帝畿

挽王庭遂處士

靜中應自識先幾寄迹醫門識者稀
野質早時經水鑑閒身終老製荷衣
交游祇擬論心久生死寧知與願違
潞水秋風梁苑月定從白鶴往來飛

挽舒大尹二首

江右風流屬老成江天俄復暗郎星
久傳詩禮誇賢子遙想儀刑律後生
耆舊空悲當日社循良猶識昔時名
懸知斧屋秋烟裏應有高人為刻銘

西風鶴唳楚天蒼憔悴儒林弔白楊
花縣辭官悲暮景

菊籬歸老慘秋陽空餘舊佩銅章暗不及新頌紫誥香
有子秋官霑寵渥豐碑行見發幽光

讀易軒為杜御史賦

風滿幽軒淨晚襟韋編三絕在追尋方看龍馬分奇偶
又見羲圖轉古今細草初生春逕淺芳花早落夜庭深
畫前有易君知否祇信堯夫最苦心

題靜學軒

書牕萬籟絕鶯聲有客牕前味六經止水不波雲影見

太虛無翳月華明亭亭自可觀人物擾擾何由悟性靈
誰似南陽老諸葛草廬默識古今情

綵繡堂為張聰御史賦

山連滄海是金華華榜青林柱史家鶴髮每看傾壽酒
鳳城先已探名花斑衣舞遍三春日繡服裁成五色霞
已見高堂頌紫誥香名留取故鄉誇

送康僉憲四川提學

萬里長江萬里橋錦城樓閣倚青霄昔賢共說山川秀

僉憲寧辭道路遙擬變三巴成雅俗還將五教布新條
好期報政歸來日鳴珮金門候早朝

送高僉憲福建提學

天書捧出大明宮拜命南征使節雄舟解御河楊柳綠
路經山館荔枝紅七閩人士沾時雨一代文章復古風
未許江山久留滯還期白首夢非熊

送彭疏僉憲廣東提學

儒官新出禁林中手捧天書按廣東嶺表只今瞻使節

島人從此變華風
霜隨白筆蠻烟靜
馬過青山瘴雨空
萬里天威應咫尺
五雲回首鳳樓重

留別院中諸友

幾年騎馬聽朝雞
憲府追蹤愧品題
散木自知非偉器
青雲何幸陟仙梯
已逢盛世無裨補
更接英僚惜解携
便捧天書天上去
五雲回首是三齊

留別趙彬

知子于今近十年
中間消息兩茫然
寧知京國相逢處

又是都門惜別筵上苑榴花偏向日官河楊柳正含烟
臨歧握手無他語願篤清脩繼往賢

留別姚克脩御史

交情方斷昔人金班馬俄聞載路音郡邑行看東魯近
衣冠祇隔內臺深朝中鵷侶思同入海上仙山憶獨臨
壯志擬磨三尺劍分攜寧遣鬢霜侵

題薛希璉耕樂卷

旭日初升布谷鳴春郊耒耜動春聲清溪引水來時滿

綠野為菑望處平
田祖有靈開稔歲
天民何幸樂生成
東阡南陌相過處
擊壤歌中答聖明

祇命山東

手捧天書出禁中
又乘驄馬按山東
秋烟荏苒連滄海
曉日熹微見岱宗
已沐聖明新化雨
乃瞻鄒魯舊儒風
小臣謬忝咨詢職
願得英賢佐九重

遊靈巖寺

靈巖有路入烟霞
臺殿高低釋子家
風滿迴廊飄墜葉

水流絕澗泛空花青松閱世風霜古翠石題名歲月賒
誰謂無生真可學山中亦自有年華

宿靈巖寺

梵宇深沉夜景遲僧房禪榻果幽奇竹鳴虛牖風過處
霜落寒巖月上時紙帳燭光團白玉石爐香燄靄青絲
紅塵馬首明朝別只恐山靈解勒移

秋日靈巖道中

路入山門景便幽高風不斷石林秋照人霜葉紅於染

拂袖嵐光翠欲流，幾過野橋橫絕澗。
遙從古剎見高樓，北峯直與天相接。
更擬攀蘿到上頭。

寄李太亨太守

會面京華兩過秋，又從海岱望揚州。
澄清志操知吾劣，出守聲名覺子優。
華館定閒徐孺榻，清池誰共李膺舟。
如何千里音書絕，不信交游是白頭。

題李廷珪僉憲嵩洛漁樵卷

清門奕世古中州，洛水嵩山總舊遊。
見說斫雲開鳥道，

還聞朔月泛漁舟自趨紫闥來烏府望使青雲伴白鷗
老去披圖思往事幾回飛興到林丘

松林書舍卷為李方伯題

四簷偃蓋碧重重挿架牙籤落影中萬谷驚濤滄海近
半窻涼月雪山通潤露瑶席霏霏雨響徹朱絃細細風
好結歲寒搜秘檢莫教飛夢逐塵蹤

題楊僉憲思親卷

惆悵高堂罷綵衣空山回首斷雲飛梧桐井迳秋風老

脩竹園林夕露微紫氣天邊鸞下疾白楊隴上鶴歸遲
栢臺有子情何似厭聽庭烏叫落暉

題觀風圖

九重深詔遣星軺使者觀風郡國遙水逐雕輪隨地遠
山開錦障拔天高嚴城樹杪門初啓候吏花邊馬不驕
萬里咨詢皆帝力生民隨處樂耕樵

高唐道中寄李廷珪愈憲

西來隨處問先生見說分符到博平滿路風花頻縱目

一川烟柳最關情
白頭每羨丹心壯
綠鬢誰知素節明
高論細聽應有日
擬分華榻共春燈

與孫大叅韓憲副同按部別後寄此

分符同出濟南城
攬轡東風並馬行
逸興細看花柳色
高談深合古今情
別來併覺新春暮
到處頻看缺月盈
絕似當年傾盖者
更期樽酒話平生

寄孫韓二公

憶過春風十里亭
二君携酒玉為瓶
小桃正吐樽前萼

嬌鳥初傳戶外聲，如此風光留客飲。
幾多懷抱向人傾，行臺此夕忽相憶。
謾掩重門惟月明。

懷李廷珪用前詩末句起韻并書于壁

擬分華榻共春燈，到日先生去博平。
別鶴行雲那有迹，落花飛絮倍多情。
空憐皓月明朱幌，尚自餘香裊畫屏。
我復東西南北去，壁間留語候歸旌。

次壽鄧郎中母韻二首

百歲星霜是永年，七閩閨教最稱賢。
自期西日堪留挽。

不信南山可變遷
白髮已看封紫誥
綵衣時復奉華筵
故應志節高如許
贏得人間福壽全

秋霜勁節自年年
誰似清門鄧母賢
半世成家遭感愴
一生教子見超遷
恩隨紫誥來華屋
春滿紅螺泛繡筵
青簡上頭書次第
香名留取古今全

詠新竹

知是乾坤一氣催
滿林新笋迸蒼苔
抽梢漸欲侵雲漢
解籜時應傍憲臺
已覺清風連座起
更搖疎雨到牕來

相看盡日添新興
白筆新詩為爾裁

樂陵道中

樂陵東去古堤長
野水村烟共渺茫
遠海天空初過鴈
大田秋老未經霜
鐵冠十載心如昨
憲節雙持鬢欲蒼
攬轡悠悠思往事
趨朝曾對御爐香

長白山懷古

山迴長白重經過
十世懷賢意若何
飯粥事空荒古寺
讀書聲歇暗烟蘿
中朝德業應難及
西夏勲名更不磨

向晚憑誰話憂樂栢臺清夜月明多

金臺送別為李進都指揮賦二首

纔將虎旅衛天居又擁雕戈出帝都
部伍散行秋野闊旌旗斜捲暮雲孤
扶桑分閫封圻近杖杜連歌雨露餘
壯節封侯應有日青雲回首是長途

虎將承恩出九重紫泥封帶御香濃
離筵濟濟都門酒征馬蕭蕭別路風
雄鎮行看滄海近歸旌遙指岱山崇
太平分閫渾閒事萬里封侯慷慨中

泰安州重寄李太亨

去年岱麓題詩寄岱麓逢人又寄詩
剖竹已當耆艾日解龜仍及聖明時
青山縱有歸來約黎首其如去後思
愧我年年持憲節涓埃無補欲何為

海上道中述懷

馬首東來歲月頻西歸猶及艷陽春
風烟滿目溪山秀花柳無邊雨露新
四海甄陶明聖主萬家耕鑿太平民
勅天千古遺歌在每抱丹心戀紫宸

青州府迎詔

丹霄快覩鳳銜書，春與天恩滿八區。
不獨山東扶杖聽，還應海內竊嵩呼。
衣冠濟濟風雲際，花柳欣欣雨露餘。
栢府微臣瞻盛事，載馳忠懇戀皇都。

次黃仲芳韻二首

京華偶爾論斯文，知是游心出聖門。
風度恍如瞻玉樹，清談藹若挹芳蓀。
薇垣三載時名大，花縣多年舊澤存。
愧我無能叨憲節，繆同述職荷天恩。

薇省分符重黑頭天官考績冠時流趨朝曉日辭丹鳳
去路西風躍紫騮自昔藩維求俊傑只今典禮尚虞周
都門此別須珍重還擬經邦贊大猷

送王秀才省兄歸京師

華不注高秋氣多大明湖水落霜波山川風景今如此
兄弟分携意若何憲府已應持玉節親闈長是近鑾坡
明年三月春光好更憶金臺有鴈過

送李永年大叅致仕十首

四朝出入受恩多詔許南歸意若何路繞青齊騶騎遠
水通淮海畫船過故園到日收禾黍別墅經年長薜蘿
父老傾懷看白髮兒童佐酒發清歌

七十懸車古亦稀明時乞得健身歸朝廷已自優黃髮
鄉里無勞羨錦衣碧水細通栽藥圃青山閒繞釣魚磯
江南事事皆堪樂莫遣流年賞興違

歷下山川入畫圖西門悵別指征途已知聖代優諸老
還似當年餞二疏歸路遠應經鐵柱名山行復見香爐

江南江北相思處鴻鴈來時好寄書

黃甲聲名四十年薇垣粉署共稱賢方看薦鶚陞三事
又乞歸身別九天恩詔近從丹闕降使車遙向碧山懸
耆英莫謾誇中洛江右風流也自傳

白髮明時老大臣封章幾上乞歸頻四朝寵覺腰金重
三代恩霑絲誥新花發薇垣成遠夢潮平揚子是通津
到家正值秋光好黃菊東籬有故人

已向明時早拂衣家山回首興如飛丹心老去聲名大

白髮歸來故舊稀幾處甘棠留畫省
繞門楊柳蔭苔磯
惟應野老來爭席坐翫沙鷗伴夕暉

聞道江南景物嘉薇垣有客正思家
池塘夜雨翻荷葉
籬落秋香散稻花德譽尚為清論重
儀刑應有正人誇
歐公曾寫歸田錄好繼遺芳播邇遐

梁苑登科二十年乘驄頻與歲時遷
忽逢先達青雲上
已是門生白髮前盛世澄清慚我劣
明時歸老羨公賢
追隨冠蓋城西別心逐行舟入楚天

纔捧除書拜好官又承恩詔許南還人辭歷下山光遠
船過真州水面寬松菊未荒三徑在衣冠不改一身閒
推恩更有新鸞誥留與家門久遠看

邂逅東藩僅一年先生何事著歸鞭曾聞碧岫雲藏屋
見說清溪月滿船歸老會尋山水樂聲名不讓古今賢
遙知林下徜徉處猶起丹心憶九天

泛舟思親

天地無窮水自流髫年已侍二親遊中原道路曾驅馬

江漢波濤更泛舟孤藐光榮叨憲節音容寂寞闕松楸
千思萬想情何極目送飛雲到故邱

送夏希純郎中歸南京

雲路分飛二十年相逢鬢髮各蒼然栢臺直指心如舊
粉署郎官職又遷北闕九霄瞻曉日南風五兩送歸船
帝京到日多佳興虎踞龍蟠入望邊

秋日東平道中

齊魯西風草樹秋川原高下過東州道邊白鶴來華表

陌上蒼麟卧古丘九曲半應非禹迹三山何處是仙洲
經行俯仰成今昔却憶當年賦遠遊

過五道嶺

峯嶺連接岱宗路從絕頂度華驄餘寒常帶陰崖雪
爽氣仍飄霽壑風春入驛亭嚴候吏雲隨憲節怪山童
方巡每歲叨天寵長見車書海宇同

寧陽行臺元夕憶黃憲使

曾憶觀燈宴後堂玉杯行酒夜何長新聲已覺隨銀甲

逸響還驚繞畫梁東道留賓能閉戶諸郎愛客解牽裳
別來好景逢元夕空向行臺對月光

沂濱書舍為曲阜令孔公堂賦

魯城南畔碧溪頭結屋藏書事事幽入戶日光浮野馬
隔簾波影漾沙鷗真傳已覺千年遠大道還從六籍求
聞說浴沂當此地春風有約事追遊

兗州道中

敷土名傳舊兗州山川遺跡快追遊泗沂凍解波猶淺

鳬嶧春回翠欲流野火碑餘秦相國悶宮詩頌魯諸侯
懸知尼父當年志夢寐長思見盛周

和壁間虞伯生皋字韻

中書幾禿管城毫盡日抄書未覺勞但得文章如布帛
不須詩句比金膏淳龐每憶黃輿厚玄鑒深期碧漢高
莫道知音人世少有魚潛渚鶴鳴皋

送陳都憲鎮關中三首

四朝風紀受恩深又見西行捧德音天上神仙知暫別

關中父老喜重臨
戍閒部伍清河曲
地遠桑麻接華陰
到處行臺懷帝闕
封章還擬罄丹心

中丞斧鉞下青霄
重鎮關中別路遙
衛水樓船春解纜
靖陵驄馬曉揚鑣
諸軍共仰新旌節
列郡仍遵舊教條
想是歸期應不遠
朝元有約聽簫韶

九重深念及西人
山鎮還須老大臣
憲節入關隨爽氣
璽書行郡布陽春
山連玉井晴飛雨
地接金城迥不塵
經濟本為儒者事
功成還擬畫麒麟

送金都憲鎮寧夏二首

大夫承詔出皇州西夏山川是壯遊
笳鼓盡迎新憲節風霜仍肅舊貔貅
久知河隴諸蕃靜又見崆峒二麥收
總賴廟謀清四海不須樽俎借前籌

西行紫誥帶新泥葱嶺河隍入馬蹄
列鎮久應烽火息連屯惟見稻秧齊
遠通貢篚來天外直布皇風到海西
萬里成功歸有日青雲滿眼是丹梯

送盧都憲鎮守寧夏二首

明時出鎮得才難莫厭經行萬里間玉節初辭青瑣闥
霜風先到賀蘭山關河控帶黃塵靜蕃落耕耘綠野閒
入覲天顏應咫尺不須頻看寶刀環

同年於我最相親憲府乘驄邁等倫正是趨朝承雨露
又看持節出風塵山川迢遞行時舊旌旆悠揚到日新
暫撫西陲歸有日看花須及鳳城春

出京師二首

孤臣泣血省愆尤詔釋羈縲出鳳州滿目山光迎馬首

一鞭歸思繞林丘
罷官已是安時命
報國空驚不自籌
遙想到家春已暮
麥黃蠶老稼盈疇

久知樗散是非才
卅載超遷歷寺臺
松柏每期冬雪茂
杏花不逐艷陽開
數莖白髮還禁老
一寸丹心未覺灰
此日為農歸故里
河汾歲晚興悠哉

患難中海昌李太守數書問及詩以報之

知己情深數寄書
問吾行止近何如
如買車已上山西路
結屋還依水北居
樂意不忘尋簡帙
生涯祇擬付耕鋤

感君交義高千古遠道何由致報珠

步朱尚寶送行韻用以留別二首

一枕邯鄲夢已醒歸鴻千里拂高冥心期皎日均能許
歌壇陽春我獨聽別去莫驚頭並白相思終是眼長青
河汾故里遺風在爭似當時續六經

驛路春風酒半醒離情花思兩冥冥穿林乳燕深深去
傍柳流鶯細細聽官渡已過滹水碧家山又近太行青
龍門舊業應如昨樵谷漁磯取次經

晚翠軒為楊大叅賦

高人雅有歲寒盟，笑傲華軒寄遠情。
最喜竹風當座起，絕憐松雪近人清。
年來勁節心能與，春去繁華眼不驚。
若此秋香還共美，擬從良史傳佳名。

春日遊禹門

野服歸來野興幽，十年仍遂禹門遊。
崖迴曲路通危棧，峽束洪濤瀉急流。
樓結飛甍臨絕漢，宮高華榜煥層丘。
鄉人未必知神意，絲管啁啾聒未休。

哭少子治

患難歸來始自憐，悲傷何事又相煎。
一經賴爾傳先業，二豎嬰人殞少年。
遺卷不堪尋舊墨，荒岡忍復見新阡。
傷心問寢寒齋夜，鴻鴈行中訝失聯。

題李麟惜陰卷

連城自古出藍田，還道驪珠在九淵。
勤苦方能求至寶，放情未必得真傳。
案頭每見秋螢聚，窓裏常知野馬懸。
年少惜陰真可畏，老子鬢髮已星然。

用舊韻酬海寧李太守四首

聞道先生近著書，高懷雅興迫難如。
蘭栽九畹誰同采，竹種千竿自可居。
溪水每從晴後釣，山田多向雨中鋤。
殷勤遠道裁詩寄，絕勝驪龍領下珠。

焚香纔暇即披書，老去無能得自如。
青簡尚尋高士傳，白雲還似野人居。
秋風婢子晨供織，細雨兒童晚荷鋤。
道不遠人真可樂，何須象罔索玄珠。

四千里外一封書，縱有瓊瑤報不如。
雲水當年思共步，

山川此日已安居
霜前棗熟從人打
雨後葵荒欲自鋤
白雪調高知和寡
強將魚目比明珠

五馬無勞事簡書
一生行止自如如
冥鴻有意隨高迹
野鳥忘機伴所居
千樹黃柑應自種
一窻青草不須鋤
門臨滄海秋先覺
長見寒光浴曉珠

立秋日

雨晴新漲落汾黃
綠樹風生戶牖涼
跋馬空懷登遠道
聞蟬還喜是吾鄉
離離禾黍東臯近
緲緲雲霞北嶺長

有酒便堪消暇日流年不管鬢成霜

題馮處士卷

忽從囂雜見真淳誰道今人不古人
四禮每宗朱氏教一門長接孟家鄰
椿庭時雨年年潤蘭砌光風日日新
青簡會須書行義高名直與董生親

次何僉憲自學韻二首

阿閣梧桐第一枝朝陽快覩鳳鳴時
西江才學推虞集北斗聲名仰退之
直道敢拋君子志中情還有正人知

青青誰似霜臺栢聳壑昂霄更有期

天衢早歲躡仙蹤金榜紅霞綯海東陳策漢廷推董子
明刑司寇數蘇公一襟氣與秋天杳千古心涵曉鏡空
兩見名藩持憲節清霜隨處踏春紅

無題

浩浩滄浪水自清曾聞漁父扣舷聲四知稀復思楊震
千載誰能慕屈平得失真如鴟嚇鳳高低應似鶯嘲鵬
何當挽取天河水一洗人間兩眼明

立春日

臘盡殘年冉冉過又逢春日興偏多故應節序經千古
自信行藏老一窩生菜任教纖手送新醪微覺寸心和
乾坤俯仰無窮意閒對東風一放歌

絳守王汝績新學詩以美之

先生為郡冠諸公興學由來有古風青史無勞稱衛覬
黃堂今復見文翁化行古水弦歌內道在金臺俎豆中
老我河汾遺教遠相思應與此心同

次林文載大參韻

歲暮相逢晉水頭，清宵剪燭話同遊。
齊名黃甲風雲闊，接武彤池寵渥稠。
宦達子應思致澤，退閒我亦樂藏脩。
却憐出處千年事，惟有儒門道德優。

對雪

雲垂四野寂無聲，大雪通宵又徹明。
在目已應知皓潔，穿簾時復鬪輕盈。
凍凝水底蛟龍蟄，饑厭庭前鳥雀爭。
高卧不妨書舍冷，此心元有歲寒盟。

久不作詩偶賦

案頭彩筆倦長吟
陡覺詩情動不禁
湖海盡除當日氣
田園深稱老年心
種瓜已自連東畛
栽漆還應滿北林
汾水晉山無限好
擬逢清景更登臨

秋日

窓戶涼風似水流
河汾八月又驚秋
寒蛩嘒嘒鳴何切
社燕翩翩去不留
飲水難期前聖樂
乞墦纔免昔人羞
求田問舍安吾老
不羨元龍百尺樓

謁伯夷叔齊廟

荒祠古栢首陽阿再拜仁賢感慨多樓設一堂還儼雅
草封雙塚正嵯峨心存兄弟難能節力挽君臣欲逝波
世上爭名爭利者高風奈此二公何

過汾陽故里

名與臨淮往日齊乘軺今過華山西參天老樹荒祠在
遍野新蕪舊宅迷將畧不須窮玉籍王封寧復數躬珪
中興唐室如公少回想忠賢首屢低

過寇萊公祠

功業澶淵冠宋朝古祠松柏晚蕭蕭儀容不泯鄉人祭
魂魄何須楚些招忠義垂聲千古在奸諛遺臭幾時消
老子持節無英計戀闕思賢首重搔

華山

馬首嵯峨見華山三峯削玉最高寒層陰舊接黃河水
秀色長連紫氣關只有烟霞生澗谷總無塵土翳林巒
西還更與山靈約擬上雲梯仔細看

溫泉

唐家天子愛溫泉故起離宮繡嶺前
山上朝元金作閣花中湯井玉為蓮
錦鳬曾泛當時水香木頻浮舊日船
賜浴未終鞀鼓動苔池留恨自年年

華清宮

天寶承平奈樂何華清宮殿鬱嵯峨
朝元閣峻臨秦嶺羯鼓樓高俯渭河
玉笛長飄雲外曲霓裳間舞月中歌
祇今惟有溫泉水嗚咽聲中感怨多

馬嵬

號令風行遍九州六軍何事此淹留
深情祇擬乾坤久絕寵寧知咫尺休
劍閣西行山寂寂渭河東去水悠悠
路邊三尺妖姬土長帶千秋萬古羞

連雲棧道中四首

陳倉西入一門來疊嶂層巒次第開
百折長途盤翠嶺千尋危棧接青崖
蒼蒼雲木鳴山鳥泱泱溪泉瀉石苔
持節未應辭路險會清蠻徼凱歌迴

莫道西行蜀道難老來深喜縱遐觀山從太白連岷嶺
水繞嘉陵出散關石積層崖知地厚路登絕巘覺天寬
驅兵過此思諸葛大節長留宇宙間

重疊峯巒掩映青不登危棧即溪行氣偏三月山蟬叫
境異千林杜宇鳴寥落人家多板屋蕭條郵舍盡茅亭
因思唐帝西巡日中夜何堪雨打鈴

總角曾從蜀道行今來鬢髮已星星不勝愛國輸忠念
無限思親感舊情林外最嫌鸚鵡舌耳邊偏喜杜鵑聲

驅馳萬里心何憚但保秋霜分義明

諸葛武侯塚

丞相孤墳何處尋褒城西去漢江陰青蕪漠漠烟橫野
翠栢蕭蕭風滿林尚憶出師當日表空歌梁甫舊時吟
中原未復星先墜長使英雄慨古今

諸葛武侯廟

武侯遺廟漢江南喬木森森雜翠嵐義感居人猶致祭
名聞過客亦停驂運謀圖陣曾為八遺恨山河尚是三

千載英雄今已矣古碑重讀意難堪

過七盤

匆匆行役敢求安鞍馬經時歷險難叱馭纔過九折坂
揮鞭又度七盤山行當絕頂知天近下盡層梯覺地寬
却喜漢中頻在望一川風物自閑閑

漢中寓目

谷盡褒斜覺眼明漢中如掌一川平封疆自昔多吞併
龍虎當年幾戰爭英主築壇魯拜將忠臣討賊舊屯兵

雄豪一去無遺跡，惟見山高水自清。

蒼溪

少陵詩裏見蒼溪，今過蒼溪日欲西。
駐節驛亭天色暝，維舟江岸浪痕齊。
風林疑有於菟嘯，雲木時聞杜宇啼。
橘柚過時黃不見，峯巒依舊翠高低。

閬中

聞道閬中山水奇，今來始得一見之。
長江縈帶碧浩渺，遠峯環繞青參差。
竹樹茂密塵不起，天宇空闊雲自移。

錦屏近郭最明秀佳句還吟子美詩

鹽亭道中

舟度嘉陵見錦屏西行幾驛到鹽亭好山最愛連峯秀
佳木偏憐古栢青老志不移方寸赤遠遊寧怯鬢毛星
休誇諭蜀相如檄千羽深期舞舜庭

送李僉都經界敘播

五月樓船發錦江中丞斧鉞靖蠻邦一天勝氣隨龍勅
千里長風捲繡幢定有奇兵擒孟獲不勞飛將斬王雙

朝廷恩信更須布苗獠行看到處降

與李都憲錦江泛舟

津頭打鼓發官船泛泛清波散曉烟岸轉漸移江上樹
艫搖頻拂鏡中天岷峨西北山重疊吳蜀東南水接連
却艤江亭窮勝觀一樽談笑好風前

錦城端午

錦官城裏遇端陽好事常年憶帝鄉
頌扇不知三伏暑賜衣猶帶九天香
却看絕塞孤雲遠閒坐空亭一面涼

佳節任從流轉在丹心不管鬢毛蒼

答徐廣文二首

三冬文史最精明發軔香名蚤已成政羨有才逢治世
却慙無力答昇平鷗鵬還擊三千水鷁鷺終期一字行
會面幾何知又別高談不盡古今情

衆中傑出見才賢文采英英骨氣全傾蓋已知心不異
談經雅覺道無偏擬陳疊疊天人策寧羨悠悠將相權
北上有期還送別為君沽取酒如泉

發成都

夜雨朝來歇怒雷
成都江上畫船開
高低竹樹連村合
遠近峯巒入望來
鼓枻易傷漁父志
著鞭難覓祖生才
烟波好景空無限
遠思撩人未易裁

納溪

持節南來幾日留
納溪小縣納溪頭
市衢寥落人何少
憲府荒涼境自幽
六詔雲山隨地遠
三巴烟水接天流
只今溪洞猶多梗
五月南征憶武侯

永思堂為賀太守賦

瀘川賀守孝心純一日何曾忘二親已痛音容隨化盡
更悲霜露逐時新情深易感無窮恨天大難酬罔極恩
我亦有親俱早世為題詩卷淚沾巾

嘉定

嘉州曾作少年遊納納乾坤五十秋四野不移山競秀
三江依舊水重流天高華夏風雲闊地入蠻荒草樹稠
城郭幾歸遼海鶴白雲今古自悠悠

題王醫士東白堂

纔見滄溟浴曉珠
俄看倒影上天衢
丹爐夜火知全伏
藥室晨光覺漸虛
野馬未穿延客榻
陽烏先照活人書
在家早起君休厭
屨迹朝來滿戶除

遊青羊宮二首

青羊宮觀鬱崔嵬
遠憶函關紫氣來
雪嶺地應通閬苑
錦城江自遠蓬萊
萬竿脩竹生玄圃
三秀仙芝長石苔
千古誰能識玄牝
只疑虛谷有風雷

千年舊是青羊肆今日翻為老子家
金榜半天標觀閣琅函滿室聚雲霞
琪林紅落三秋葉瑤圃黃開九月花
有物混成人罕識會從真境讀南華

諸葛武侯廟十首

萬里橋西有古祠武侯遺像似當時
孤臣只擬炎光振遺恨猶悲漢祚衰
繞砌綠苔經雨色滿林蒼栢冒霜枝
祇緣忠義無今古不泯邦人百世思

茅廬枉顧即依依猶恨當時見面遲
文武才猷天下少

君臣契合古來稀
南征纔見功初遂
北伐那堪願已違
尚有錦江遺廟在
英名千古自光輝

股肱漢室舊宗臣
魚水當年意氣親
時節如逢逐鹿日
風雲還起卧龍人
出師前後丹心切
討賊頻煩大義伸
萬古英名天地在
叢祠長近錦江濱

王佐雄才久已聞
叢祠今見錦江濱
莓苔歲久漫碑刻
風葉秋高打廟門
每有孤忠興漢室
可無長策定中原
江山離合寧非數
成敗難將往事論

南陽躬稼似天民感激元因枉顧頻初識樓桑親帝胃
還如白水舊真人已從荆益開王業幾欲咸秦掃寇塵
歷數雖窮遺廟在大名長與歲時新

一時魚水風雲會千載君臣祭祀同鐘鼓尚存當日廟
江山猶繞舊時宮畫簷金榜蛟龍出粉壁丹青戶牖通
割據奸雄俱泯滅荒丘誰與酹西風

茅廬抱膝正長吟忽際風雲許與深草昧每存興漢計
艱危肯負托孤心出師表在垂天地八陣圖存慨古今

欲問祠堂何處是錦官城外栢森森

高視乾坤志未酬草廬長嘯意悠悠時才總附奸雄勢
大老還為漢室謀兩表曾聞辭後主三軍幾欲定中州
伐功未就皆天數錦里英風古廟秋

赤精帝子真苗裔三顧茅廬起卧龍英論已知分鼎勢
長才欲試補天工纔聞遣使通江表又見驅兵出漢中
禮樂未興人已逝古祠松栢撼高風

乾坤不復有斯人間氣奇才絕等倫管樂規模難並駕

伊周事業可相親
紅旗幾出褒斜道
綠野還耕渭水濱
時去千年猶廟食
英風凜凜漢忠臣

御書樓為吾昌衍叅政賦

古今書賜由中秘
藏在君家百尺樓
奎耀夜晴通戶牖
芸香風細散簷幽
篇章總是天人學
函藏深為釋老留
從此黃金不須積
子孫勤讀繼前脩

蜀中立春遣懷

世態炎涼閱已多
老懷今日柰春何
一年持節金臺客

萬里通潮錦水波北塞已聞休士馬南荒行復罷干戈
時清若許歸田里願和康衢擊壤歌

春日遣興

閒館春深日正長萋萋春草遍池塘溪雲疎雨梨花白
煖日輕風柳線黃讀易自能窮宇宙賦詩聊爾記年光
錦城風景雖云樂故里關心未可忘

北歸有喜而賦

駐節西川僅一年北歸恩自九重天非才豈敢妨賢路

無補空慙費俸錢為客載添新白髮到家還閱舊青編
急流勇退應難及千載高風尚凜然

送杜員外歸省還京師

歸省西川未幾時促裝又復上京師榮親已荷褒封典
報國難忘雨露私路夾山花開錦繡棧盤崖樹拂雲霓
遙知紫禁趨朝後粉署從容日正遲

敬軒文集卷九

欽定四庫全書

敬軒文集卷十

明 薛瑄 撰

律詩

詠顏魯公

蓬利何堪屈大才平原出守亦微哉
忽逢動地風塵起不使中流砥柱摧
爭坐已難追雅論立朝寧畏忤奸回
自騎箕尾歸天上長播英風遍九垓

送太守致仕

五馬蕭蕭出帝鄉，都門祖席倍輝光。
天恩老覺腰金重，客思遙牽別路長。
龜虎已應辭郡國，貂蟬時復憶班行。
風烟縹緲鄉關近，川谷猶疑下鳳凰。

錦官驛官送櫻桃

錦官驛吏送櫻桃，紅顆堆盤磊落高。
時果已知西蜀美，古詩難見少陵豪。
嘗新暫遣中情悅，感物還添遠意勞。
多少上林鶯啄遍，一春歸興正滔滔。

草涼樓驛看紅白芍藥

芍藥花開山驛中小
闌紅白各分叢
濃糝獨向風前立
素質如從月下逢
明媚併超塵世色
妖嬈均得化神功
誰知傾國傾城者
一往滔滔萬古同

過武功縣

持節西來過武功
扶桑日日曉光紅
渭河水遠波聲小
太白山高樹影重
遺址已無慈德寺
居人猶說有郃封
東行無限前朝事
盡在紅塵綠野中

題休休亭

中條山下王官谷草木烟霞景物幽仙李固知時靡靡
野亭從此號休休座中爽氣常飄洒天際浮雲任去留
墜笏已超塵網外高名千古鎮悠悠

贈張僉憲

邂逅金陵已七年相逢論舊意欣然江東風紀當時振
山右聲名此日傳綠野盡耕春雨後清霜早落艷陽前
朝端公道明如日持憲應知數俊賢

挽陳先生

歸來烟水釣舟橫
雲白其如足下生
尚有菁莪經雨茂
空餘桃李向春榮
高情祇許鄉人慕
遺事誰從太史銘
賴有賢甥今宦達
為揚聲譽照蒼冥

挽祝處士

鴻去青冥定幾年
東吳聲譽至今傳
高情未必尋丘壑
清隱還應在市廛
竹塢邀賓留舊榻
芸牕教子剩殘編
黃門底是推恩處
紫誥迴鸞下九天

豫讓橋次陳僉憲韻

千年豫讓有遺橋懷古還停使者輶
季世忠臣存大節
頽波砥柱見孤標
吟邊涼吹聲蕭瑟
望處秋天影寂寥
無限繁華俱泯滅
英名終古自難消

挽蕭御史

共惜西江老豸冠
白雲乘去不知還
總帷夜捲霜風冷
華屋秋扃曉月寒
遺蹟定應歸太史
榮名長是在人間
明時有子登三事
永感終天淚不乾

述懷

已承恩詔許還山又被虛名繫一官每向班行嗤老醜
空耽典籍尚寒酸妨賢政自慙公論竊祿能無愧素餐
早晚還應乞身去石田茅屋伴清歡

河間獻王墓

漢家宗室最稱賢遺事曾經閱簡編偶過河間尋往跡
空餘荒塚帶寒烟頻求千古書連帙獨對三雍策幾篇
雅樂未興人已逝雄歌惟有大風傳

過德州

山東一別十餘秋，白髮重來過德州。
關市尚開臨水戶，郡城猶聳入雲樓。
霜臺駐節思前度，憲府乘驄憶舊遊。
此日又騎官馬去，朔風吹雪路悠悠。

德州除夕

昔捧天書按部來，之官又上鳳凰臺。
頻登風紀知庸德，屢陟廷平愧菲才。
寓館明朝添一歲，晴霄此夕麗三台。
元正馳賀心何似，金殿香浮寶扇開。

寄高苑李嗣昌廣文

安邑分携幾十年中間會合總茫然
華燈每憶連珠玉綺席空懷醉管絃
顧我已添新白髮知君猶擁舊青瑣
却慙頻歲叨天寵悵望豐城劍氣邊

兗州人日二首

去年西蜀逢人日人日今春客兗州
行止可應無定跡歲華仍復易周流
驛亭盡日風頓起官路漫天雪未休
南到彭城祇幾驛天晴擬放呂梁舟

驛亭窻戶總光輝
人日紛紛雪亂飛
關塞有兵皆凍合
園林無樹不春歸
風威肅肅朝來靜
雲葉飄飄晚漸稀
清興此時誰與適
論心殊覺故交違

孟子祠

鄒國叢祠古道邊
滿林松柏帶蒼烟
遠同闕里千年祀
近接宣尼百世傳
獨引唐虞談善性
力排楊墨絕狂言
功成不讓湮洪水
萬古人思命世賢

彭城懷古二首

戲馬臺邊雉堞高參差樓閣入雲霄漕河控引淮黃近
驛路通連海岱遙天府豈知成霸主彭城空復駐英豪
大風折木飛沙日想見天心翊漢朝

當年禹跡舊分州走馬南來遂此遊地勢縈廻環翠嶺
闕城峭拔枕黃流燒餘豪傑千年塚春老佳人百尺樓
周覽未能窮往事官河又放下洪舟

雪中過高郵湖

高郵湖裏雪中過雪片無聲點白波天水渺茫遙自接

烟雲杳靄暗相和寒蓼滿眼漁翁少畫舫隨風去客多
還似滄浪水清濁只應難覓扣舷歌

過邳溝懷古

荒陂野水古邳溝千載曾經煬帝遊煖日輕風牽錦纜
垂楊芳草引龍舟春殘故國閒金屋花滿蕪城醉玉樓
一自真龍飛晉水亂雲空結海天愁

高郵阻雪

高郵城下維舟楫雨雪連朝阻去程澤國風烟春冉冉

野湖波浪晚冥冥凍消疎柳長堤濕響徹脩篁候館清
南到大江祇幾驛晴霄行覩鳳凰城

高郵大雪河水

已過立春十五日淮南天氣太嚴凝重湖晶晶層冰結
千里茫茫積雪平霄漢連朝飛鳥絕官河隨處客舟停
東風解凍須臾事波綠粼粼野燒青

自儀真入大江

儀真南入大江隈江上雲帆向曉開滿目好山青簇簇

連天駭浪白皚皚還思二十年前渡又自三千里外來
北關承恩方浩瀚之官今上鳳凰臺

寄海寧李太守

又是分携十七年寥寥幾度信音傳
濫官白髮知吾劣歸老青山覺子賢
蠟屐每多登覽興錦囊應有唱酬篇
著書更法春秋筆還肯緘情寄一編

金陵春望四首

錦繡江山一望中金陵佳氣正葱葱
石城尚踞耽耽虎

鐘阜長蟠矯矯龍
淡靄遠遮三月柳
瑞烟深護萬年松
風流王謝何須問
開國還思舊股肱

金陵最好是新春
風景無邊入望頻
山似洛中浮秀色
水從天上泛通津
千門垂柳初經雨
滿路飛花不起塵
深荷發生同萬物
兩京回首憶楓宸

佳麗層城王氣中
春來無樹不青蔥
湖光湛湛跳紅鯉
橋影沉沉卧白龍
錦繡園林開艷杏
烟霞澗谷挺長松
無邊風景皆堪賞
千首新詩興未窮

皇都又是一年春立馬長堤眺望頻麗日斜明紅杏塢
煖烟輕護綠楊津風來野水微生浪雨過天街迴不塵
最愛祥雲呈五色氤氲長是繞楓宸

簡張都憲二首

榜題龍虎舊聯名宦迹升沉隔兩京離合雖驚頭並白
交親終喜眼俱青濫登棘寺知無補峻陟霜臺倍有聲
近得高鄰親孟氏不妨剪燭話平生

藉藉朝端有盛名憲臺周歷兩神京封章已見輸忠赤

事業還期著汗青
風度宛如瞻玉樹
辭華真是擲金聲
共論三十年前事
聯步青雲滿路生

周儀賓水筠軒

曲闌干外小方塘
塘上蕭蕭繞翠簷
一鏡平開涵影細
萬竿齊動引風涼
根穿近岸藏科斗
稍接遙空下鳳凰
水竹雙清曾到此
金樽相對興難忘

春日遣興簡張都憲廖丁二大理

春來無日不連陰
風物蕭騷思不禁
雨急梅花飄白玉

天寒柳線勒黃金宦情不與江流競樽酒肯隨人意深
况是一年寒食近松楸千里正關心

再用陰字韻簡張都憲

好風乍起掃輕陰清思撩人不自禁與客便傾花下酒
放懷寧惜橐中金高情肯負年華泰交誼難忘歲月深
春興不知凡幾首長吟因見古人心

送倪尚書赴召二首

天書遠召舊師臣送別金陵喜氣新莫道分符淹歲月

為報鵷行舊知己一卿贏得鬢星星

暑夜簡趙駙馬

大扇頻揮汗不乾那堪酷暑夜漫漫
寂無風露徘徊處空有星河悵望間
真是流金魚鑠石定應焚澤更焦山
清涼只有仙侯府長夕冰傳瑤瑤盤

簡張都憲楊尚書鄭侍郎廖少卿丁寺丞

棘寺秋官接憲臺山光水色畫圖開
青林雲氣當牕見翠浪風煙入座來
楊柳影中冠蓋過芰荷香外吏人回

好生正仰吾皇德共播仁恩遍九垓

再用前韻

鍾山南望鳳凰臺山下平湖一鏡開
近岸紫駟穿柳去沿堤畫舫采菱來
山禽將子飛還止水鳥銜魚去復回
無限太平門外景神遊何必訪仙垓

再用前韻三首

風紀都應屬內臺官清公道一時開
科條自是明天討門館何由有貨來
聲譽已知馳峻極文章况復動昭回

不須遍攬江湘轡坐見澄清匝九垓

廷尉刑曹與栢臺高門俱對碧湖開天涵波影閒雲度
雨雜泉聲爽氣來此日官僚聯轡入往年鵷鷺候朝回
近來執法尤宣朗應佐陽光燭九垓

刑曹理寺近烏臺坐對湖山畫障開芳草有情還漸長
好風無約自頻來移文謾想高人去聯騎頻同上客回
為戀明時歸未得思親空復誦南垓

戲作遊仙

用前韻

瓊瑤萬仭中天臺珠宮貝闕參差開靈風響下碧虛裏
連翩鶴馭仙人來釣天揮綽九奏畢羽衣搖曳萬舞迴
後天不老凋三光排風馭氣遊遐垓

海中湧出金銀臺陽烏濯耀蒼烟開弱水瀛洲不可到
飈輪鶴馭相往來洪濛開闢幾萬古桑田走馬能千迴
抱一之子可輕舉相期汗漫遊九垓

銀屏金屋瑤作臺化人宮殿中天開東見蓬萊水清淺
西去幾復青鳥來雲錦之裳文五色倬彼雲漢凌昭回

下視九域一毫芒何異蟻蠓飛塵埃

仙山中有學仙臺凌虛上接天門開青衢黃道倒影出
望舒日馭東西來玉宇無聲彩雲濕雲漢屈注萬里迴
寥廓無鄰安可極重陽之數歷九垓

樵雲野老

白頭已與世相違笑指生涯在翠微伐木忽看雲滿斧
束薪不覺露沾衣息肩頻向青林歇荷月長從綠野歸
一曲浩歌天地闊遠山回首晚霞飛

